

四部要籍選刊 蔣鵬翔主編

浙江大學出版社

奧鳥報反沈於六反處昌慮反下同根宜衡反闌食饗

不為槩

槩量也不制待賓客饌具之所有。食音嗣

祭

祀不為尸

尊者之處為其失子之道然則尸卜筮無父者。為其音于偽反下注除不為孤皆同

聽於無聲視於無形

恒若親之將有教使然

不登高不臨

深不苟些言不苟笑

為其近危辱也人之性不欲見毀訾不欲見笑君子樂然後笑。訾

疏

為人至苟笑。正義曰此一節明孝子居處及行立待賓祭祀敬慎之事各隨

阮刻禮記注疏

五

無餘席非唯不可上亦

阮元校刻

四部要籍選刊

蔣鵬翔 主編

阮刻禮記注疏

五

(清) 阮元 校刻

浙江大學出版社

本冊目録（五）

卷第十四

月令第六……………一〇八一

校勘記……………一一三三

卷第十五

月令……………一一五九

校勘記……………一二〇三

卷第十六

月令……………一二二七

校勘記……………一二七九

卷第十七

月令……………一三一一三

校勘記……………一三六五

附釋音禮記注疏卷第十四

禮記

鄭氏注

禮記注疏

月令第六

○陸曰此是呂氏春秋刪合為此記蔡伯喈王肅云周公所作

疏

正義曰按鄭目錄云名曰月令者以其記十二月政之所行也本呂氏春秋十二月紀之首章也以禮家好事抄合之後人因題之名曰禮記言周公所作其中官名時事多不合周法此於別錄屬明堂陰陽記此卷所出解者不同今且申鄭旨釋之按呂不韋集諸儒士著為十二月紀合十餘萬言名為呂氏春秋篇首皆有月令與此文同是一證也又周無大尉唯秦官有大尉而此月令云乃命大尉此是官名不合周法二證也又秦以十月建亥為歲百而月令云為來歲授朔日即是九月為歲終十月為授朔此是時不合周法三證也又周有六冕郊天迎氣則用大裘乘玉輅建大常日月之章而月令服飾車旗並依時色此是事不合周法四證也故鄭云其中官名時事多不合周法然按秦始皇十二年呂不韋死十六年并天下然後以十月為歲首歲首用十月時不韋已死十五年而不韋不得以十月為正又云周書先有月令

何得云不韋所造又秦并天下立郡何得云諸侯又秦以好
 兵殺害毒被天下何能布德施惠春不興兵既如此不同鄭
 必謂不韋作者以呂氏春秋十二月紀正與此同不過三五
 字別且不韋集諸儒所作爲一代大典亦採擇善言之事遵
 立舊章以秦自不能依行何怪不韋所作也又秦爲水位其
 來已久秦文公獲黑龍以爲水瑞何怪未平天下前不以十
 月爲歲首乎是鄭以月令不韋所作月令者包天地陰陽之
 事然天地有上下之形陰陽有生成之理日月有運行之度
 星辰有次舍之常今既贊釋其文不得不略言其趣按老子
 云道生一一生二二生三三生萬物易云易有大極是生兩
 儀禮運云禮必本於大一分而爲天地易乾鑿度云大極者
 未見其氣大初者氣之始大始者形之始大素者質之如此
 四者同論天地之前及天地之始老子云道生一道與大易
 自然虛無之氣無象不可以形求不可以類取強名曰道強
 謂之大易也道生一者一則混元之氣與大初大始大素同
 又與易之大極禮之大一其義不殊皆爲氣形之始也一生
 二者謂混元之氣分爲二二則天地也與易之兩儀又與
 之大一分而爲天地同也二生三者謂參之以人爲三才也
 三生萬物者謂天地人既定萬物備生其間分爲天地說有
 多家形狀之殊凡有六等一曰蓋天文見周髀如蓋在上二

曰渾天形如彈丸地在其中天包其外猶如雞卵白之繞黃
楊雄桓譚張衡蔡邕陸績王肅鄭玄之徒並所依用三曰宣
夜舊說云殷代之制其形體事義無所出以言之四曰昕天
所讀爲軒言天北高南下若車之軒是吳時姚信所說五曰
穹天云穹隆在上虞氏所說不知其名也六曰安天是晉時
虞喜所論注考靈耀用渾天之法今禮記是鄭氏所注當用
鄭義以渾天爲說按鄭注考靈耀云天者純陽清明無形聖
人則之制璿璣玉衡以度其象如鄭此言則天是大虛本無
形體但指諸星運轉以爲天耳但諸星之轉從東而西必三
百六十五日四分日之一星復舊處星既左轉日則右行亦
三百六十五日四分日之一至舊星之處即以一日之行而
爲一度計二十八宿一周天凡三百六十五度四分度之一
是天之一周之數也天如彈丸圍圓三百六十五度四分度
之一按考靈耀云一度二千九百三十二里千四百六十一
分里之三百四十八周天百七萬一千里者是天圓周之里
數也以圍三徑一言之則直徑三十五萬七千里此爲二十
八宿周回直徑之數也然二十八宿之外上下東西各有萬
五千里是爲四遊之極謂之四表據四表之內并星宿內惣
有三十八萬七千里然則天之中央上下正半之處則一十
九萬三千五百里地在其中是地去天之數也鄭注考靈耀

云地蓋厚三萬里春分之時地正當中自此地漸漸而下至
 夏至之時地下遊萬五千里地之上畔與天中平夏至之後
 地漸漸向上至秋分地正當天之中央自此地漸漸而上至
 冬至上遊萬五千里地之下畔與天中平自冬至後地漸漸
 而下此是地之升降於三萬里之中但渾天之體雖繞於地
 地則中央正平天則北高南下北極高於地三十六度南極
 下於地三十六度然則北極之下三十六度常見不沒南極
 之上三十六度常沒不見南極去北極一百二十一度餘若
 逐曲計之則一百八十一度餘若以南北中半言之謂之赤
 道去南極九十一度餘去北極亦九十一度餘此是春秋分
 之日道也赤道之北二十四度爲夏至之日道去北極六十
 七度也赤道之南二十四度爲冬至之日道去南極亦六十
 七度地有升降星辰有四遊又鄭注考靈耀云天旁行四表
 之中冬南夏北春西秋東皆薄四表而止地亦升降於天之
 中冬至而下夏至而上二至上下蓋極地厚也地與星辰俱
 有四遊升降四遊者自立春地與星辰西遊春分西遊之極
 地雖西極升降正中從此漸漸而東至春末復正自立夏之
 後北遊夏至北遊之極地則升降極下至夏季復正立秋之
 後東遊秋分東遊之極地則升降正中至秋季復正立冬之
 後南遊冬至南遊之極地則升降極上冬季復正此是地及

星辰四遊之義也星辰亦隨地升降故鄭注考靈耀云夏日道上與四表平下去東井十二度爲三萬里則是夏至之日上極萬五千里星辰下極萬五千里故夏至之日下至東井三萬里也日有九道故考靈耀云萬世不失九道謀鄭注引河裔帝覽嬉云黃道一青道二出黃道東赤道二出黃道南白道二出黃道西黑道二出黃道北日春東從青道夏南從赤道秋西從白道冬北從黑道立春星辰西遊日則東遊春分星辰西遊之極日東遊之極日與星辰相去三萬里夏則星辰北遊日則南遊夏至星辰北遊之極日南遊之極日與星辰相去三萬里以此推之秋冬放此可知計夏至之日日在井星正當嵩高之上以其南遊之極故在嵩高之南萬五千里所以夏至有尺五寸之景也於時日又上極星辰下極故日下去東井三萬里也然鄭四遊之極元出周髀之文但日與星辰四遊相反春分日在婁則婁星極西日體在婁星之東去婁三萬里以度言之十二度也則日沒之時去昏中之星近校十度旦時日極於東去旦中之星遠校十度若秋分日在角則角星極東日體在角星之西去角三萬里則日沒之時去昏中之星遠校十度旦時日極於西去旦中之星近校十度此皆厯乖遠於數不合鄭無指解其事有疑但禮是鄭學故具言之耳賢者裁焉但二十八宿從東而左行日

從西而右行一度逆沿二十八宿按漢書律厯志云冬至之時日在牽牛初度春分之時日在婁四度夏至之時日在東井三十一度秋分之時日在角十度若日在東井則晝極長八尺之表尺五寸之景若春分在角晝夜等八尺之表七尺五寸之景冬至日在斗則晝極短八尺之表一丈三尺之景一丈三尺之中去其一尺五寸則餘有一丈一尺五寸之景是冬夏往來之景也凡於地千里而差一寸則夏至去冬至體漸南漸下相去一十萬五千里又考靈耀云正日假上八萬里假下一十萬四千里所以有假上假下者鄭注考靈耀之意以天去地十五萬三千五百里正月雨水之時日在上假於天八萬里下至地一十一萬三千五百里夏至之時日上極與天表平也後日漸向下故鄭注考靈耀云夏至日與表平冬至之時日下至於地八萬里上至於天十一萬三千五百里也委曲俱見考靈耀注凡二十八宿及諸星皆循天左行一日一夜一周天一周天之外更行一度計一年三百六十五周天四分度之一日月五星則右行日一日一度月一日一十三度十九分度之七此相通之數也今厯象之說則月一日至於四日行最疾日行十四度餘自五日至八日行次疾日行十三度餘自九日至十九日行則遲日行十二度餘自二十日至二十三又小疾日行十三度餘

自二十四日至於晦行又最疾日行一十四度餘此是月行之大率也二十七日月行一周天至二十九日強半月及於日與日相會乃爲一月故考靈耀云九百四十分爲一日二十九日與四百九十九分爲月是一月二十九日之外至第三十日分至四百九十九分月及於日計九百四十分則四百七十爲半今四百九十九分是過半二十九分也但月是陰精日爲陽精故周髀云日猶火月猶水水火則外光水則含景故月光生於日所照魄生於日所蔽當日則光盈就日則明盡京房云月與星辰陰者也有形無光日照之乃有光先師以爲日似彈九月月似鏡體或以爲月亦似彈九日照處則明不照處則闇按律麻志云二十八宿之度角一十二度亢九氏十五房五心五尾十八箕十一東方七十五度斗二十六牛八女十二虛十危十七營室十六壁九北方九十八度奎十六婁十二胃十四昂十一畢十六觜二參九西方八十八度井三十三鬼四柳十五星七張十八翼十八軫十七南方一百一十二度丑爲星紀初斗十二度終婺女七度子爲玄枵初婺女八度終於危十五度亥爲娵訾初危十六度終於奎四度戌爲降婁初奎五度終於胃六度酉爲大梁初胃七度終於畢十一度申爲實沈初畢十二度終於井十五度未爲鶉首初井十六度終於柳八度午爲鶉火初柳九度終張十

六度已爲鶉尾初張十八度終於軫十一度辰爲壽星初軫十二度終於氏四度卯爲大火初氏五度終於尾九度寅爲析木初尾十度終於斗十一度五星者東方歲星南方熒惑西方太白北方辰星中央鎮星其行之遲速俱在律曆志不更煩說春秋說題辭云天之爲言顛也說文云天顛也劉熙釋名云顯也又云坦也地底也其體底下載萬物又云地諦也五土所生莫不信諦元命包云日之爲言實也月闕也劉熙釋名云日實也大明盛實月闕也滿則缺也說題辭云星精陽之榮也陽精爲日日分爲星故其字日下生也釋名云星散也布散於天又云陰蔭也氣在內奧蔭也陽揚也陽氣在外發揚此等是天地陰陽日月之名也祭法黃帝正名百物其名蓋黃帝而有也或後人更有增是其天高地下日盈月闕皆星度少共斗度多日月右行星辰左轉四遊升降之差二儀運動之法非由人事所作皆是造化自然先儒因其自然遂以人事爲義或據理是實或構虛不經既無正文可馮今皆畧而不錄

孟春之月日在營室昏參中日尾中

孟長也日月之行一

歲十二會聖王因其會而分之以爲大數焉觀斗所建命其四時此云孟春者日月會於諏訾而斗建寅之辰也凡記昏

明中星者為人君南面而聽天下視時候以授民事。參析林反中如字徐丁仲反後放此長丁丈反譏足俱反又足侯反本又作姁同訾子

疏

孟春至尾中。正義曰此言孟春者夏正建寅之月也呂不韋在於

秦世秦以十月為歲首不用秦正而用夏時者以夏數得天正故用之也周禮雖以建子為正其祭祀田獵亦用夏正也日在營室者按三統厯立春日在危三度正月中日在室十四度元嘉厯立春日在危三度正月中日在室一度。昏參中者按三統厯立春昏畢十度中去日八十九度正月中昏井二度中去日九十三度元嘉厯立春昏昴九度中月半昏觜觿一度中皆不昏參中者月令昏明中星皆大略而言不與厯正同但有一月之內有中者即得載之計正月昏參中依三統厯在立春之後六日參星初度昏得中也但二十八宿其星體有廣狹相去遠近或月節月中之日昏明之前星以過於午後星未至正南又星有明暗見有早晚明者昏早見而旦晚沒暗者則昏晚見而旦早沒所以昏明之星不可正依厯法但舉大畧耳餘月昏明從此可知。注孟長至民事。正義曰禮緯謂庶長稱孟故云孟長也若於人言之庶為孟若於物言之直為長也不取庶長之義先儒以孟春亦謂之庶長按尚書康誥云孟侯書傳天子之子十八稱

孟侯並皆稱孟豈亦庶長乎先儒以孟春稱庶長者非也云
 日月之行一歲十二會者日行遲一月行二十九度半餘月
 行疾一月行天一市三百六十五度四分度之一過市更行
 二十九度半餘逐及於日而與日會所會之處謂之爲辰鄭
 注周禮大師職云十一月辰在星紀十二月辰在玄枵正月
 辰在娵訾二月辰在降婁三月辰在大梁四月辰在實沈五
 月辰在鶉首六月辰在鶉火七月辰在鶉尾八月辰在壽星
 九月辰在大火十月辰在析木此是一歲十二會也云聖王
 因其會而分之以爲大數焉者聖王因其日月自然之會而
 分爲十二分以爲大略之數焉所以爲大略之數者以二十
 九日過半月及於日月不可分兩月各有二十九日又兩月
 各有強半之日合兩半而成一日是一月有三十日一月二
 十九日一夫一小之外仍有餘分一年十二月六大六小摠
 有三百五十四日是歲十二會之實數也仍少十一日四分
 日之一未得周天聖王憖以三百六十五日四分日之一爲
 十二會之大數一會即一辰也是一辰有三十度十二辰摠
 有三百六十度餘有五度四分度之一度別爲九十六分摠
 五度有四百八十分又四分度之一爲二十四分并之爲五
 百四十分十二辰分之各得四十二分則是每辰有三十度九
 十六分度之四十二計之日月實行一會唯二十九分過半

若通均一歲會數則每會有三十度九十六分度之四十二
是以分之爲大數也此云孟春者日月會於娵訾而斗建寅
之辰者娵訾是亥次之號立春之時日在危十六度月半兩
水之時日在營室十四度營室號娵訾但星次西流日行東
轉東西相逆若月初之時則日在星分之初月半之時則在
星分之半月終之時在星分之末凡十二月日之所在或舉
月初或舉月末皆據其大略不細與厯數齊同其昏明中星
亦皆如此斗謂北斗循天而轉行建一月一辰辰三十度九
十六分度之四十二正月建寅二月建卯三月建辰四月建
巳五月建午六月建未七月建申八月建酉九月建戌十月
建亥十一月建子十二月建丑也其十二辰之名按律厯志
云孳萌於子則子孳也又云紐牙於丑則丑紐也又云引達
於寅則寅引也又云冒萌於卯則卯冒也又云振美於辰則
辰振也又云巳盛於巳則巳也又云萼布於午則午萼也
又云昧後於未則未昧也又云申堅於申則申堅也又云留
孰於酉則酉留也又云畢入於戌則戌畢也又云該闔於亥
則亥該也律厯志又云北伏也陽氣伏於下於時爲冬冬終
也萬物終藏南任也陽氣任養萬物於時爲夏夏假也假大
也西遷也陰氣遷落萬物於時爲秋秋者孳也物孳斂也東
者動也陽氣動物於時爲春春蠢也物蠢生也云凡記昏明

中星者為人君南面而聽天下視時候授民事者按書緯考靈耀云主春者鳥星昏中可以種稷主夏者心星昏中可以種黍主秋者虛星昏中可以種麥主冬者昴星昏中則入山可以斬伐具器械王者南面而坐視四星之中者而知民之緩急急則不賦力役故敬授其日甲乙乙之言軋也日民時是觀時候授民事也

疏

其日甲乙○正義曰其當孟春仲春季春之時日之生養之功謂爲甲乙○注乙之至功也○正義曰乙軋聲

相近故云乙之言軋也云日之行春東從青道者以星辰之次謂之黃道春時星辰西遊黃道近西黃道之東謂之青道日體不移依舊而行當青道之上故云東從青道云月爲之佐者以日月皆經天而行月亦從青道陰佐於陽故云月爲之佐知月亦從青道者以緯云月行九道九道者並與日同而青道二黃道東赤道二黃道南白道二黃道西黑道二黃道北并黃道而爲九道也並與日同也云萬物皆解孚甲自抽軋而出因以爲日名焉者以日能生養萬物萬物皆抽軋而生因其抽軋以爲日功之名也孚甲在前抽軋在後則應孟春甲季春爲乙今三春揔云甲乙者孚甲抽軋相去不遠

早生者即孟春孚甲而抽軋也晚生者即季春孚甲而抽軋也律麻志云出甲於甲則甲是孚甲也又云奮軋於乙則乙軋也又云明炳於丙則丙炳也又云大成於丁則丁成也又云豐茂於戊則戊茂也又云理紀於己則己理也理謂正紀綱也又云改更於庚則庚更也謂物改更也又云悉新於辛則辛新也又云懷任於壬則壬任也又云陳揆於癸則癸揆也謂物之陳列可揆度也云乙不爲月名者君統臣功也者月既佐日同有甲乙之功今獨以甲乙爲日名不以乙爲月名故云君統臣功君謂日也日統領月之功猶若君統領臣之功以爲己功俗本云君統臣功定本云君統功無臣字義俱通

其帝大皞其神句芒

此蒼精之君木官之臣自古以來著德立功者也大

皞宓戲氏句芒少皞氏之子曰重爲木官。大皞上音太後文及注大族太史大寢大室大微大廟大祝大尉大宰皆同皞亦作昊胡老反大皞宓戲也句芒古侯反下音亡句芒木正也少皞之子曰重爲之後句芒皆放此宓戲音密又音服戲又作虧亦作犧又作疏其帝至句芒。正義曰自孟春義同許宜反重直龍反疏之月訖其日甲乙明於天道其事略竟從此以下至鴻鴈來明聖人奉天時及萬物節候也故蔡邕云法象莫大乎天地變通莫大乎四時縣象著明莫

大乎日月故先建春以奉天奉天然後立帝立帝然後言佐
 言佐然後列昆蟲之列物有形可見然後音聲可聞故陳音
 有音然後清濁可聽故言鐘律音聲可以彰故陳酸醢之屬
 也羣品以著五行爲用於人然後宗而祀之故陳五祀此以
 上者聖人記事之次也東風以下者效初氣之序也二者旣
 立然後人君承天時行庶政故言帝者居處之宜衣服之制
 布政之節所明欽若昊天然後奉天時也。其帝大皞者謂
 自古以來木德之君其帝大皞也謂之皞者按異義古尚書
 說元氣廣大謂之皞天則皞皞廣大之意以伏羲德能同天
 故稱皞以東方生養元氣盛大西方收斂元氣便小故東方
 之帝謂之大皞西方之帝謂之少皞。其神句芒者謂自古
 以來主春立功之臣其祀以爲神是句芒者主木之官木初
 生之時句屈而有芒角故云句芒言大皞句芒者以此二人
 生時木王主春立德立功及其死後春祀之時則祀此大皞
 句芒故言也此之言據死後享祭之時不論生存之日故云
 其神句芒句芒言其神則大皞亦神也大皞言帝則句芒當
 云臣也互而相通大皞在前句芒在後相去縣遠非是一時
 大皞木王句芒有主木之功故取以相配也。注此蒼至木
 官。正義曰蒼是東方之色故下云駕蒼龍服蒼玉此是蒼
 精之君也則東方當木行之君也云著德立功者著德謂大